

Hinagpis ng Hinlalato at Iba Pang mga Tula

Genevieve Soriano Aguinaldo

HINAGPIS NG HINLALATO

Hiwa-hiwalay na hilakbot
hingal na himno
ng himpak na hiyaw

hibik na hilahid
sa higanteng hilhil

hilabong hilahil
hibong humihimas
sa himalang hilagpos

hibang na hinhin
hinaharang sa hinala
hinihimok na ihimlay ang hiyaw

himayin ang himbing

hinawan ng himatong
ang nangagsi-hinamad

nang huminto ang hinay
at hirangin ang hingasing

hindi pa naghihimulmol
ang himala

ULTIMO ULAM

Umaalingasaw ang utang
ng urong-sulong na ulupong
uma-umagang umiigib
ng umpok ng mga umid
ulol sa ulok ng umit
utal sa ukilkil ng mga ulat
uyam sa umpis na mga uugod-ugod
paulit-ulit na pag-ulos
sa utod na pang-unawa ng mga ungas
umiilag sa untog ng ulirat
ulianin sa umog ng unos
usóg na naka-umang sa uuto-uto

YEMA SA YUNGIB

Yinakag ng yabag ng yugto
ang yupi-yuping yumi

yupapa at yayat
sa yukoleleng yakyak

yukayok sa yugyog ng yumari
yumao sa yanig

ng yakal na yurak
yapak ng yamuan

yutyot na yumakap
sa yamot na yutà

yamutmot na yaman
yupyupang yumabong

sa yapos ng yinurakang yagit